

DIE ARWEITSGEMEINSCHAFT FLOMERSCHUMM BRÄSENDIERT:



Hallo, lieve Läser,

widder isses gelunge, e ganzes Hefdel mid Beiträg zu fille. Unser Audore sinn dessmool vunn Flomerschumm, Ebbschdää, Hahnhofo, Lambsem unn sogar vunn Siedfrankreisch. Dodebei sieht merr ah mool, dass bei uns im Ord nit bloß ähn Dialekt gebabbelt werdd unn isch muss genau uffbasse, dass isch alles rischdisch abschreib.

Besonders gfräat hott uns dess Gedicht vunn de neie "Haardtschdreeßlern" Heike Mayer. Unn weil se ah noch rischdisch gerädselt hott, hott se glei de erschde Breis griggt. Dess hott se jetzt devunn!

An dere Schdell begrieß isch mool alle neie Leit in Flomerschumm unn hoff, dass se sich ball bei uns wohlfiehlen. Dess Wort "Neibirger" will merr nit so rischdisch uffs Babier, weil isch dess jo ziemlich dabbisch finn. Dess sinn doch bloß Leit, die jetzt erschd zugezoge sinn. Die warn jo vorher wu annerscht ah schunn "Birger", unn sinn nit bletzlich vumm Himmel gfallt. Enn Neibirger iss ferr misch e "Neigeborenes". Merr kânt hegschdens saage, dess sinn "frisch zugezogene Birger", awwer dodefor weer die Abkerzung "FZB" unn die hänn jo die Zwiwwelböck schunn beschlagnahmt. An sich gibts jo bloß drei Sorrd Flomerschummer: 1. die Oigeborene, 2. die wu schunn länger do wohnen unn 3. die wu noch nit so lang do wohnen - awwer Flomerschummer simmer allminanner!!! Dess Theader um die Bebauung vunn de Haardtschdrooß hott mid de Mensche, die dort wohnen, iwverhaubt nix zu due.

Aller dann - herzlich Willkomme unn ferr alle Leit viel Frääd middem neie Heft!

Walter Rupp

Die Heike Mayer hott uns gschriwwe:

" Isch hab misch sähr iwver Eier Bläddche gfret unn habs glei gelese. Des hott merr wirklich Schbass gemacht, obwohl es schunn a bissjie schwerer zu läse wor, als wann isch die Rhoipalz läse dät." " Iwwrischens, als klar wor, mer ziehe noch Flomerschumm, wor de äste Wordd, was moi Kläne gelernt hot "Zwiwwelböck" unn dess verzellt se jetzt ah jedem: " Sie hääßt Corinna, iss

drei Jahr alt unn enn Flomerschummer Zwiwwelbock".

So unn jetzt kummt dess Gedicht:

Im lädschde Jahr hämma entschiede, mer wolle unsre Klä was biete.

Mer kaafe uns a Reiehaus, su äns in Flomerschumm do draus.

Vom äschte bis zom lädschde Stä hämma alles uns o'gsä.

Vom Källarboddem bes zom Dach; mer wore drausse jeden Daach.

Unn hänn gsäe wie es wachst, ach wenn am Bau wor was verpatzt.

Des äne Fänschta wor net schief, es wor en ganze Stock ze tief;

oder als vom Klo die Deer, hätt no links geheert viel mehr;

oder als im Bad von unne Leerrohre dorch die Deck sinn kumme.

Selbscht die's gemacht hänn - des als Mahnung - hatte davon gar kä Ahnung.

Wozu des hätt gut soi selle, konnt uns ach käna verzelle.

Wollte mer uffs Dachgschoss druff, musste mer die Leedre nuff.

Des wor a mächtisch wacklisch Sach, vom Källar unne bis offs Dach.

Unn trotzdem simmer froh wie 's wor, global gsäe wor's doch klor,

als mer ze zwet - mol draus mol drinn - uff de Baustell rumgekraxelt sinn.

Inzwische is ach alles richtisch, su wie mer 's wollte, des is wichtisch.

Jetzt wohne mer mit Krimms unn Krämpel in unserm nagelneie Tämpel.

Die Zeit seitdäm verging im Nu unn trotzdem is noch viel ze du.

Da du mer ach kä Langweil kriege unn faul off unserm Rase liege.

Mer schaffe weider, machen's schä, dann basst des Haus ach zur Gemää.

Do stehn schunn viele schöne Hitte, am Ortsrand unn ach in de Mitte

met schöne Gääde drumerum. - Hoch lebe unser Flomerschumm!!!

Heike Mayer, seit 18 Jahr Frankedahlerin, Weibingerin vunn Flomerschumm

E dollie Poschkaad mit de Rädsel-
leesung iss aus Tokio bei uns oigange.
Die Absdender hänn sogar de dritdde
Breis gemacht:

*"Hiezuus im Flieger hawwe
merrs Flomerschummer Gebabbel
gelääse. Beim Suggijaggi in
Schinagawa (Tokio)
hawwe merrs Rädsel geleest.*

*Die zwää Auswerrdische
Inge unn Hannelore*



28.08.99
P.H.



Die Kerweredd vum Hanne mann, die zeigt, wass sich im Ord getan:

Dunnerkeil und Sacrament, ich blicke in ein volles Zelt, vunn de Zwiwwelböck hier aufgestellt für euch und für den Rest der Welt. Es sprach sich rum bis an den Rhein, Kerwe ist in Flomersheim.

Und alle, alle Jahre wieder, bricht es aus, das Kerwefieber. Vorm letzte Sunndag im August wird man unruhig in de Brust, flimmernde Herzen und zittrige Hände, das Warten hat jetzt bald ein Ende. Vom Putzwahn wern die Fraun erfasst, man prüft, ob es Kleid vom letzte Jahr noch passt. Zum Friseur muß man noch geh, an de Kerwe muß mer gut ausseh' Die Kinner kriegen noch Kerwegeld. Und dann geht's ab in's Kerwezelt. Dort trifft man Freunde und Bekannte, alle liebe Anverwandte, de Unkel Schorsch und Tante Grete, trifft Ortsvorsteher, Ortsbeiräte, die Vorsitzende vun de Vereine, trifft alle Große und ach Kleine, man trifft Leut' vun der AG, Presseleute kann man seh', trifft Offizielle von de Stadt, sofern man Samstags welche hat, und Miss Strohhut kann man sehn, mein lieber Gott, was ist die schön. Sie sitz vor mir, hier am Tisch, gell Jessica, des war en Punkt fer mich. Sie präsentiert in nächster Zeit, die Stadt und Vororte bundesweit. Und diese holde Weiblichkeit, kriegt jetzt viel Applaus, Ihr Leit'.

Und auch daran kann man seh'n, dass in Flomersheim die Uhren anders gehen!

Der Kerweumzug ist vorbei, dreißig Nummern warn dabei, und zum ersten Mal, in diesem Jahr waren zwei Wagen aus Eppstein da. Die ham fidel und ungezwunge, an unserm Umzug teilgenomme. Mancher sicher nicht versteht, was da plötzlich vor sich geht, Eppsteiner in Flomersheim, das konnte jahrelang nicht sein. Natürlich war's auch umgekehrt, weils paar Verbohrte hot gestört. Doch der Anfang ist gemacht, für eine gute Nachbarschaft. Unser Dank gilt auch der DJK, die Auslöser der Sache war.

Schon jahrelang sind wir bemüht, dass man an einem Strange zieht. Und steter Tropfen höhlt den Stein, in Eppstein und in Flomersheim. Denn zwischen beiden Orten gibt's ne große Lücke, die „Schwörer-Hans-Gedächtnis-Brücke“!

Und auch daran kann man sehn, dass hier die Uhren anders gehen!

Thema Nummer eins vor fast einem Jahr - der Ortsvorsteher nicht mehr da. Die Affäre Dietmar Borth, kennt glab ich jeder hier im Ort, und in der Stadt dachte man beschissen, das hätt mer vorher wissen müssen. Sicher könnte man noch lästern, doch die Sach' ist Schnee von gestern.

Ein neuer Mann mußte an's Ruder - und schon hatten wir ihn, de Dr. Bruder. Und seitdem hammer festgestellt, dass der des Ruder auch festhält. Wenn man so plötzlich, über Nacht, zum Ortsvorsteher wird gemacht, und dann den Kurs noch beibehält, das ist das, was uns gefällt. Und auch noch, fast so nebenbei, OB-Kandidat in Frankenthal zu sei, sich hier zum Ortsvorsteher stellt, für viel Ehr und wenig Geld, um nachher zweimal zu verlieren, da hat man keine Star-Allüren, da ist man demokratisch aufgeweckt, lieber Gerhard, mein Respekt.

Die Flomersheimer danken dir, für fast ein Jahr Ortsvorsteher hier, hast deine Sache gut gemacht und mich auf 'ne Idee gebracht. Krawatten sind nicht so dein Fall, das sah man ja fast überall, ich weiß, du siehst auch so gut aus, doch mit nem Schlips wird noch mehr drauß, drum hab ich vunn meinem Kerwegeld, die grüne Krawatte hier bestellt. Als Geschenk vun diesem Ort - und die rot is fer de Dietmar Borth.

Und wiederum da kann man sehn, daß hier die Uhren anders gehen!

Ladestraße, Bahngelände, Ortsbeiratsthema ohne Ende, ein Supermarkt der muss hierher, dann fällt's einkaufen nicht schwer. Und anschließend do wird gebaut, so hatte man schnell die Stroß versaut. Ich wett, es gibt ka zehn Leut im Zelt, denen diese Bebauung dort gefällt. Die Häuser, sicherlich ganz schree, tun an de falsche Stell' dort steh'! Und zwischen Pergola und Zwiwwelbrunne hott mer das Grünzeug weggenomme. Ei mer hätt's noch weiter treibe müsse, ich hätt die Pergola abgerisse, und der letzte Hausbesitzer hätt es schree, bei dem würde unser Zwiwwelbrunne im Vorgarten steh. Und wenn man die Sache noch weiter spinnt, der Hausbesitzer unser Wappentor als Hauseingang nimmt, do kann mer sich nur noch die Haare raufe, ei der könnt jo es Kerwefreibier im Schlofzimmer saufe.

Das wars mal wieder liebe Leute, Küßchen, Schüßchen, Schluß für heute. Doch „Halt“ mir fällt noch etwas ein, es geht noch um ne Flasche Wein. Der Tennisclub im letzten Jahr, Festwirt an der Kerwe war, die haben 'ne tolle Idee gehabt, und de Zwiwwelböck eine Flasche Wein gebracht. Mit guten Wünschen für dieses Jahr, was wohl in der Flasche war? Drumm bitte ich jetzt auf die Schnelle, Zwiwwelböck-Chef Rolf Müller samt Flasche an diese Stelle. Er zieht jetzt gleich den Korken raus, und holt den Inhalt dort heraus. Was wird wohl geworden sein, aus diesem guten Tropfen Wein?

Oh Gott, es ist nicht übertrieben, aus Tennisbällen wurden Zwiebeln. Demnächst wird's in der Presse stehn, in Flomersheim ist ein Wunder geschehn.

Tennisfans aus aller Welt, stehn bei unsre Bauern uff em Feld, mit ihre alte Tennisbäll', da, mach mer mol Zwiwwele schnell! Jetzt ganz im ernst, es ist nicht zum lache, ei do könnt mer noch e Geschäft draus mache.

Und auch daran kann man sehn, das in Flomersheim die Uhren anders gehn.

So, jetzt tu ich schnell verschwinde, wenn de Festwirt sie begrüßt hot, gibt's endlich was zu trinke, ich wünsche schöne Kerwetage, es wird lustig, keine Frage, ich soll euch noch grüße vunn de AG und hoff', dass ich euch nächst Jahr all' gesund widder seh.

Zum Kerweborsch vergewaltigter AGF-Vorsitzender Rainer Hannemann

Enn Bauer schdeht am Scheierdoor unn pinkelt durch de Ritz.

Inne fällt die Sens grad um - unn ab isse, die Schbitz.

Frieher hotts jo kä Gloopabier gewwe. Do iss Alles genomme

worre. Moin Unkel hott als gsaat: " Meer nämmen bloß dess zaarde

PARRESEBASCHDIANKNEIPPSMALZKAFFEEUDDESÄGGELABDRITTSBABIER"

DIE WELD ISS E DORF v. H. + W. Rupp + Madame Anne

Im leedschde Joahr war in de Rhoipalz zu lääse, dass jetzt uff de ganze Weld die Internet-Benutzer in ehrrm Glotzkaschde die "Zeitung für die Pfalz" finne können (<http://www.ron.de>). Sogar die Eskimoos könn jetzt iwwer de FCK noochlääse (falls se nix bessres vorhänn). Uff jeden Fall war bei demm Ardiggel ah e Internet-Seit abgedruckt. Dodrin hott e Madam Vayssiere aus Carmaux e Noochricht an de Rhoipalz ehr Gästebuch gschiggt. Sie schreibt, dass e ehemoolischie Pälzern aus Hainfeld iss, dief unne in Siedfrankreisch hoggt unn regelmäßig im RON die Palz-Noochrichte schdudiert. Do hämmer gedenkt, dääre Fraa köndmer vielleicht e Frääd mache, wammer ihr unser Gebabbelhefde zuschigge deht. Iwwer die Rhoipalz war die Adress nit zu erfahre, weil die nit rausfunne hänn, wuhär die Noddiz kumme iss. Also hämmer äfach browiert, obwohl merr blooß de Name unn die Schdadt gewisst hänn. Dess Päggl iss awwer ganz zielsicher akumme, weil die Fraa Vayssiere in demm 10000-Oiwohner-Schdädtche iwweeraal als die "Allemande" bekannt iss - unn korz denoh war schunn e Antwort do. Dess Gedicht wolle merr eisch nit vorenthalde:

"Als ich heit, wie so jede Morche, mit e bissl Freed, e bissel Sorche,

de Briefkaschte uffmach und de Brief seh dort und ich mer denk wer mir heit wohl gschriwwe hot - ich tipp uff Rechnung oder sonstiges Amtsgeschriebe, in mei'm Alter kriecht mer halt kä Liewesbriefe, doch was fer Üwerraschung, es ist kein Flopp en dicke Brief von Walter un Helge Rupp. Ich sach Eich, was hab ich mich g'freet. Wildfremde Leit schreiwen mir, dank Internet unn deshalb glab ich, mir wern immer mehr moderner unn die Welt werd immer unn immer klenner. Unn wenn's so weiter geht, des is en klarer Fall, dann liecht Carmaux bald newer Frankedal!"

Biss ball - Anne

Rädseluffleesung auserm 7. Hefd

Dess leedschde Rädsel war jo mool widder gaanz gaanz äfach. 43 rischdische Leesunge sinn oigange, dodevunn sinn 3 an de Kerwe gezooge worre unn die Absender hänn sich (hoffendlich) iwwer de AGF-Seggd gfräät:

6 Flasche ferr die Heike Mayer aus de Haardtschdrooß

4 Flasche ferr die Susanne Uebel aus Ebbschdää unn

2 Flasche ferr die zwää Geeschaas Inge Diehl/ Hannelore Brechtel

Wer jetzt noch nit die Antwortde wääs, denn wolle merr jetzt endlich erleese:

1=FREGGER - 2=SCHNORRES - 3=KESCHDE - 4=MIGGESCHISS -

5=SCHOBBEFLÄSCHEL - 6=NUDEL - 7=MOLLEKEBB - 8=BULLDOGG -

9=SCHÄÄL - 10=GNASCHDER - 11=BOBBELSCHDE - 12=SCHNAWWELTASS -

13=GRODSEL - 14=GUDSELBABIER

Neies Schbiel - neies Gligg - uff de neggschd Seit iss widder wass zu gewinne

Die Leesungen vumm Rädsel bis zum 1.1.2000 bidde wie immer bei uns in de Keramikwerkschdadd in de Fräänsemer Schdrooß 107 abgewwe. Dort gibts ah noch AGF-Kochbischer unn Ordsfahne unn Gebabelhefde (ah noch vunn friehere Ausgabe) unn Woihnachtsposchdkaade vunn de schännschde Bilder vumm ledschde Woihnachtsmarktkinnermoolweddbewerb. Außerdem hammer ah noch die "Flomerschummer Schdorchefahn" zu verleihe, dass merr sieht, bei wemm grad e neies Bobbelsche akumme iss.

Ebbes iwwer die alde Zeide

1945 iss vumm Petrys Hugo enn Theaderveroin ins Lääwe gerufe worre, unn misch hott merr gfroogt, ob isch ah mit-mache wolld. Kä Broblääm - isch war nadierlich mit Eifer debai unn hab glei moi Schweschder Hedi mitgenumme.

Als erschdes hämmer "Die Rääs nooch Haiiddi" gschbiel. Iwwer Winder sinn dann in de TuS-Hall 3 Schdigger gschbielt worre. Dess hot uns arg viel Frääd gemacht. Dess war noch in de Noochgriegszeit, do hotts kä Färnseher gewwe unn do sinn so viel Leit kumme, dass merr äh Schdig bis zu 3 mool gschbiel hänn. Jeder Besucher, wu zu uns in die Vorschdellung kumme iss, hott enn Briggedds oder e Schdig Holz mitbringe misse, dass merr hänn känne Feier mache. Mit ähm Word - es war e armie, awwer e schäänie Zeid.

Wammer Theaderbroob ghatt hänn, so drei bis vier mool in de Woch, simmer aschließend zus Hauge. Do iss noch Bleedsinn gemacht worre unn gsunge bis schbeed in die Nachd unn wann de Blatz in de Kich noch so glää war, iss ah noch gedanzt worre. Ach unn äwe dess Hauge, die Tande Anna unn ehrn Mann de Eichään, hänn domools silwernie Hochzisch ghatt. Dess Feschd heddener mool erlääwe misse. De ganze Theaderveroin war oigelade. Meer hänn e Theaderschdiggel uffgiehrt unn die Kabell Wewers vunn Lambsem hott zum Danz uffgschbielt. Zum Esse hotts Grumbeersalaad unn Schdallhaas gäwwe - mehr hännse jo net biede känne. In däre Zeid war Jeder mit Allem zufriede. Ferr die Fressalie hott merr domols enn Bezugsschoi gebraucht. Grumbeere hatt merr uffem Feld gschdobbelt unn Haase hott Jeder selwer gezooge. In demm Jahr bin isch mit demm zsamme kumme, wu heid mein Mann iss. Dess hab isch alles demm Theaderveroin zu verdanke.

Dess war im Jahr 1946.

Martha Chrischdmann



Jetztert kummt enn Tatsachebericht vunns Scherre ehre Bärbel, dess iss dess zarte Flomerschummer Mädchen, wu in Lambsem ehr Massaschebraxis hott unn dort uns aame greizlahme Paziände die wehe Hammelbää langzieht:

DIE GSCHISCHT VUNN DE LANGE HOSSE

In moiner Braxis hott mool Ähner agerufe - er hett so Schmerze unn er bräucht dringend enn Termin. Moi Frollein vunn de Ameldung hott dann gsaat: **"Alla hopp - wann dess so schlimm iss, kummen Se halt glei häär; meer schieben Se irgendwie zwischenoi"**. Gleidruff isser kumme unn hott merr soi wehes Bää hiegschdreggt. **"Halde mool"** - hab isch gsaat, **"die Hosse missen awwer runner, sunscht kann isch jo net massiere!"** - **"Wieso"**, seschder do uff hochdeitsch, **"mir schmerzt doch nur die Wade, da brauch ich doch nicht die ganze Hose auszuziehen?!"** Dess war vielleicht enn Schaff, bis isch demm vergliggert ghatt hab, dass isch durch die Hosse kä Gfiehl hab unn nit massiere kann. Roin Medizinisch betracht, muss isch jo schunn dess ganze Arweitsgebiet sehe, nit bloß e Schdiggl vunn de Haxe. Ach Godd, hott där sich geziert. Irgendwann iss merr dann zu bund worre unn isch hab gegnorrt: **"Hosse aus odder zu de Deer naus!"**


Dann isser langsam rausgerigg, warum er sich partuu nit ausziehe wollt. Heit moje hett er vor lauder Schmerze vergesse, soi Unnerhesselscher azuziehe. (Vielleicht warn se ah grad bei de Wesch).

Er hott se dann doch ausgezooge unn isch habbem die Waad gekneet.

Jetzt awwer mool ganz ehrlich: Wege dem Bissel hett er net so enn Uffschdand mache misse - wie wann isch sowas noch nie gsehe hett.

Bärbel Scherr-Filbert, mit Unnerschditzung vunn de Selzer Carola

Fortsetzung folgt..... (do wärremerr ah garnit logger losse - die Redakzion)



De erschde Mehdräseher im Dorf - 3. Epos

Gäheheit waren die erschde Mehdräseher die reinschde Ungetüme. Doch wär den Ernde-Ablauf vor de Mehdräseherzeit gekennt hott, der muss doch sage, dass dess doch e kollossaale Erleichderung war. Soviel polnische Erndehelfer kännt merr jo garnit grigge. Unn vunn de Lohnkoschde mool ganz abgese, es war so, wie wann merr s Rad nei erfunde hett. Vorher war's e Schinnerei mid dem Selbschdbinner, gezooge vunn drei Gail, unn dess Uffschdelle vunn de Garbe zu gläane Pyramiede hott edliche Taag gedauert. Meer Buuwe hänn uns dodemit unser Kerwegeld verdient, obwohls ganz schää hart war, mit de Baarfieß uff denne Schdobbelägger rummzuwetze. Zwää Woche schbeeder sinn die Garbe dann abgelaade worre unn in die Scheier kumme. So manschie Ladung iss do unnerwägs ausnannergeritscht weil se falsch gelaade war odder sogar umgekippt. Dess war e Gezeeder unn e Flucherei. Wann dann im Herbscht die Dreschmaschine unn dess Lokomobil vunn Hof zu Hof gschoowe worre sinn, dann waren dess Hehepunkte, so wie die Kerwe.

E großes Thema war des Esse ferr die Schoinedrescher. De Name vumm Bauer hott gelangt unn die Leit hänn schunn gewißt, wasse zu Esse griggen. Odder wann's ghääße hott: Weiße Kees unn Quelle, do hott jeder gewißt, bei welle Bauer grad gedrosche werred. Merr derf halt nit vergesse, 's war glei noom Grieg unn die Leit hänn all Hunger ghatt.

De Meyer Oddl mit soim Mehdräseher hott schunn domools e Lohndrescherei ghatt. Merr hott demm Oddo gsaat, wu de Agger iss unn der hott dann gsaat, wann unn um wieviel Uhr dass merr gedrosche griggt. Ämool sollte merr am Achde owens drakumme. Unn so simmer mid dem Draggdoor unn zwää Rolle hinnedra die Hessemer Gass nuffgfahre in Richtung Hahnebriggll, dann de Lange Hahne nuff, uff die Nachtwääd. Korz vor de Neune war dann de Oddl do. Die Sägg unn die Bännel waren schnell uff de Abfillbiehn gelade unn's Wischdigschde nadierlich, de gläane Gräpper vunn Hans Richard hott ah noch nuff zu de Sägg gemisst. Schunn isses losgange. Am Afang iss alles brima geloffe, bis uff ämool dess Schdroh hinne an de Maschien nimmie zammegebunne war. *"Dess hämmer glei"*, hott de Oddl gsaat unn iss unner soim Mehdräseher verschwunde - de Brauers Heinsche glei hinne noo. Langsam isses dunkel worre unn ausgerechend jetzt ruft de Glää noch soim Vadder, er mißt emool. *"Glei, halt's noch e bissel"* hodder unne rausgerufe. Awwer dess *"glei"* hott halt gedauert, de Glä iss vunn ähm Bää uffs anner gedribbelt. *"Do pinkel halt owwe runner, 's iss jo schunn dunkel"*.

Glei druff heer isch de Meyer Oddl saage: *"Heinsche, meer heeren uff, moje frieh geht's weider - meer sehn jo garnix mäh unn jetzt fangts ah noch a zu rejne"*. *"Scheißdregg"*, hodder noch gflucht unn soi verschmeerde Finger abgebutzt amme Lumbe, der schwärzer war wie soi Händ.

Danke an lu



Wammer emool enn Beidraag ferrs "Gebabbel-Hefd" schreibt, do sieht merr erscht, wass dess ferr e Queelerei iss, bis merr die rischdische Werrder findt. Selbschd de glännschde Ardiggel werd e paar mool umgschriwwe. Do kammer die Leit blooß bewunnere, denne dess schoinbar ganz flissisch aus de Fedder laaft - unn genau sooo jemand hämmer bei uns in Flomerschumm. Ess gibt nix in unserm Ordsgschehe, wu unser "rasendie Reborrdern" nit driwwer schreibt. Egal

ob Veroinsläawe, Ordsbollidigg, AGF-Sache odder wass sunscht so bei uns bassiert, garnit lang dennoh kammers in de "Rhoipalz" lääse. Durch ehr läwänndische unn guud rescherschierde Berichte iss merr immer beschdens informiert. Unner ehre Ardiggel schdeht dann immer dess Kerrzel (lu). Hinner denne zwää Buschdaawe verschdeggelt sich unser nädde AGF-Schriftfiehlerin Ursel Lutz. Wär se kännt, der wääß, dass dess "lu" bei ehr ah "laufend unnerwäägs" hääße kännt. Seit viele Johre, unn dess wolle merr an däre Schdell emool ganz besonders betone, opfert se ehr Freizeit ferr die Allgemeinheit unn iss iwweraal verdräade.

Danke Ursel, meer sinn froh, dass merr dich hänn!!!!!! (gr)*

**Die "Gebabbel-Redaktion"*



Iwwer die Oschderzeit hott uffem Kerweplatz enn gläane Reit-Zirguss soi Zelde uffschlagge ghatt. Dess war haubtsächlich wass ferr die Kinner. Die hänn uff de Gaischer durch de Ord reide dirfe. Awwer meer Äldere hänn ah unser Frääd dro ghatt, weil uns dess Gedrabbel vunn denne Pferdehufe in die Jugendzeit zuriggversetzt hott. Der Geruch vunn denne frische Gaulsgnoddle hott ähm dann de Reschd gewwe. Ahhhh, genau wie friejer! Dess war halt wass Annres, wie der Auspuffgschdank, der heit durch unser Schdrooße zieht.

Walter Rupp



Enn Parrer sitzt in ähner vollbesetzte Schdrooßebahn. Kummt ähner roi, der nimmi feschd uff de Bää iss. Er angelt verzweifelt nooch Halt. Voll Erbarme schdehd de Parrer uff unn iwwerlosst sein Blatz demm "Wagglische". Der losst sich erleichdert in de Sitz falle unn sescht: **"Dank schää, Herr Parre. Meer schoint, Sie sinn de Änzische, där wu genau wääs, wie merr sich in so're Siduazion fieht"**.

Christl Müller

unn nit vergesse.

FLOMERSCHUMMER WOIHNACHTSMARKT

AM 5.12. 1999
KERWEPLATZ

Do gibts Weihnachtspostkääde mit de zwaa Siegerbilder
vumm Mookveddbewerb 1998, vumm Benjamin Sorg
unn vunn de Mandy Fehl



Die Flomerschummer Arweitsgemeinschaft bedankt sich wie
immer herzlich ferr denn koschdenlose Drugg bei de Firma

DREHER-DRUCK

MIKROFILM-CONSULT GMBH

Hannongstr. 27, 67227 Frankenthal

Tel- (06233)27242 - Fax (06233)27552

Gschdaldung Walter Rupp - verdählt im November 1999 - AGF